



SIARAN MEDIA JABATAN WILAYAH PERSEKUTUAN

PROGRAM SEMARAK AIDILFITRI MENYERIKAN HARI RAYA 1,000 WARGA WILAYAH PERSEKUTUAN KUALA LUMPUR YANG KURANG BERKEMAMPUAN 17 APRIL 2025

Dalam membangunkan Malaysia MADANI yang sentiasa cakna dengan keperluan rakyat, Jabatan Wilayah Persekutuan bersama Dewan Bandaraya Kuala Lumpur menganjurkan acara majlis tahunan bagi komuniti Wilayah Persekutuan Kuala Lumpur menerusi Program Semarak Aidilfitri 2025/1446H. YB Datuk Seri Dr. Zaliha binti Mustafa, Menteri di Jabatan Perdana Menteri (Wilayah Persekutuan) hari ini menyerahkan sumbangan zakat berupa wang tunai sebanyak RM200.00 kepada 500 orang asnaf di Wilayah Persekutuan Kuala Lumpur termasuk anak-anak yatim, warga emas, ibu tunggal, OKU dan mereka yang kurang berkemampuan. Selebihnya seramai 500 penerima lagi akan menerima sumbangan Aidilfitri ini secara berperingkat. Sumbangan yang disampaikan dalam Program Semarak Aidilfitri ini merupakan sumbangan wang zakat daripada Majlis Agama Islam Wilayah Persekutuan yang diperolehi daripada pembayar-pembayar zakat di ketiga-tiga Wilayah Persekutuan.

Pemilihan penerima sumbangan ini dipilih melalui senarai asnaf yang berdaftar dengan MAIWP, sistem eKasih dan Jabatan Kebajikan Masyarakat. Kategori asnaf yang dipilih juga termasuk golongan fakir, miskin, al-gharimin, al-riqab, fisabillah dan muallaf. Melalui penganjuran program Semarak Aidilfitri Wilayah Persekutuan Kuala Lumpur ini, pihak kerajaan dapat menyantuni golongan miskin yang seterusnya dapat meringankan beban golongan ini selaras dengan penekanan kerajaan untuk peduli dan belas kasihan selari dengan aspirasi Malaysia MADANI Ihsan dalam memastikan kebajikan rakyat terus terpelihara.

Program Semarak Aidilfitri ini menjadi medium berkongsi rezeki dengan golongan penjaja dan peniaga kecil yang selari dengan inisiatif Ihsan@PUJI yang mana terdapat lebih kurang 20 orang penjaja/ peniaga kecil yang terlibat dalam penyediaan juadah Aidilfitri pada hari ini. Program ini juga dapat memupuk semangat persefahaman sesama kita dalam usaha merealisasikan matlamat pembangunan dan kesejahteraan semua. Sekali gus mengukuhkan kasih sayang dan cinta (*sense of belonging*) yang mendalam terhadap wilayah kita.

Diharapkan melalui program Semarak Aidilfitri Wilayah Persekutuan ini dapat menjadi medium dalam mengukuhkan hubungan perpaduan, kerjasama dan kasih sayang dalam kalangan komuniti dengan menyemai dan menyemarakkan nilai-nilai kesejahteraan, keamanan, keadilan, kemakmuran serta kebajikan tanpa mengira latar belakang.

**Disediakan oleh:
Bahagian Komunikasi Korporat
Jabatan Wilayah Persekutuan
17 April 2025**

